

Sin visita en il «blog» da la chanceliera federala

Curtas istorgias da la democrazia per rumantsch en l'internet

■ **(anr/vi) Dapi l'avrigl po mintgin visitar il «blog» da la chanceliera federala Corina Casanova en l'internet. Ella ha publictà diesch contribuziuns sut il titel «curtas istorgias davart la democrazia».** Tgi che vul po valitar e commentar las istorgias en il blog che la chanceliera maina a chaschun da l'onn electoral. Las pitschnas istorgias tractan reminiscenzas u fatgs istorics en connex cun elecziuns. Las curtas istorgias mussan dad ina vart: Igl è sa midà pauc puncto marketing politic entaifer ils ultims 2000 onns. Ils cussegls, che Quintus Tullius Cicero aveva dà a ses frar Marcus per sia candidatura sco consul da Ruma, valan anc oz. Da l'au-tra vart vesa il visitader dal blog che la democrazia sa mida incuntin, cunzunt il dretg d'eleger – betg mo quel per dunnas, mabain era quel per giuvens ed esters.

Candidats ston consultar Cicero

«Tgi che candidescha e vul vegnir tschernì dovra blers amis e partisans e sto persuader las massas. Co fan ins quai?» scriva *Corina Casanova*. Cun sia resposta sa referescha ella sin Quintus Tullius Cicero. Lez ha scrit ina istruzuiun detagliada e pratica per ses frar Marcus che candidava



Corina Casanova maina in blog. Mintgin po commentar e valitar las diesch istorgias «electoralas» che la chanceliera ha publictà fin uss.

KEYSTONE

63 avant Cristus per daventar consul da Ruma.

Il pli important per il success è l'atgna persuasiun. Perquai aveva Quintus recumandà a ses frar da far in trenament mental, circa sco ils sportists d'ozendi. «Sche ti es en la publicitad stos ti pensar d'in cuntin: Jau fatg carriera politica, jau less davantar consul, consul da Roma!»

In candidat stoppia restar ferm internamain, envers anora stoppia el dentant adattar «sia fatscha, ses frunt e ses discours al pensar ed als basegns da mintga visavi». Quest cussegl commentescha la chanceliera cun la remartga forsa in pau ironica: «In talent teatral è damai insatge fitg util per ina candidatura.»

Marcus Tullius Cicero è la finala vegni elegì ed è oz enconuscent sco in dals gronds oraturs da Ruma. I valia pia anc oz la paina da leger l'instrucziun electorala da ses frar Quintus – betg mo per candidats en il cumbat electoral, mabain era per burgais e burgaisas che van ad eleger, scriva Casanova.

Eleger cun 16 onns?

Enfin il 1991 valeva en Svizra il dretg da votar a partir da 20 onns. Lura ha il suveran decidì ch'ìls giuvens dastgan votar ed eleger a partir da 18 onns sin plaun fede-

ral. «Cun quai n'è dentant betg anc liquidada la dumonda tgi che dastga cundecider en las dumondas politicas en Svizra», scriva la chanceliera. «Anzi, il dretg da votar e d'eleger a partir d'ina vegliadetgna da 16 onns ed ils dretgs politics per persunas estras èn oz en discussiun.»

Glaruna haja introduci sco sulet chantun il dretg da votar a partir da 16 onns. Quai è capità a chaschun dal cumin il 2007. Ils Giuvens socialistes avevan proponì da laschar cundecider las persunas da 16 e 17 onns sin champ communal e chantunal. La regenza aveva fatg ina cuntraproposta: Ils giuvens duain dastgar eleger a partir da 16 onns, ma els n'obtegnan betg l'elegibladad en autoritads. Ma il parlament glarunais ha refusà la proposta da la regenza. Perquai è sulet la proposta dals Giuvens socialistes vegnida suttamesa al cumin ed il pivel da cumin glarunais ha acceptà quella.

L'onn 2009 han era Basilea-Citad, Uri e Berna refusà il dretg da votar a partir da 16 onns. Las discussiuns davart questa tematica, ma era davart il dretg da votar per esters, restan vinavant allerta.

Il blog da la chanceliera federala:
<http://www.bv34.admin.ch/category/rumantsch/>